

Zeitschrift: Akzent : Magazin für Kultur und Gesellschaft
Herausgeber: Pro Senectute Basel-Stadt
Band: - (2007)
Heft: 4: Schwerpunkt Basler Airlines

Artikel: Dr Flugzyyg-Absturz bi Hoochwald : e Daag won y nie vergiss : am 10. Aprille 1973, 19 Minuten ab achti demoorgen...
Autor: Miville-Seiler, Carl
DOI: <https://doi.org/10.5169/seals-842933>

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

Download PDF: 04.05.2025

ETH-Bibliothek Zürich, E-Periodica, <https://www.e-periodica.ch>

Dr Flugzyyg-Absturz bi Hoochwald

E Daag

won y nie vergiss

Am 10. Abrille 1973, 19 Minuten ab achi demoorgen...

...isch z Bristol die viermotorigi Vickers Vanguard 952 gstartet. Sie isch charteret gsi vo dr Invicta International Airlines und hätt sotte 139 Passagier und 6 Lyt vo dr Bsatzig uff dr Flughaafe Basel-Milhuuse bringe. D Passagier: das sinn zem ene groosse Dail jungi Mi-ettere gsi, vyl drvoo mit Kinder, Mitgliider vo Fraueverain vo drey änglische Deerfer. Si hänn wellen en Uusflug in d Innerschwyz mache. Am viertel ab zääni wäär d Landig gsi.

Im digge Nääbel vo sällem Daag het dr Pilot d Oriän-terierig verloore. Noomen en eerschten Aaflug isch er reguläär in e zwaiti Landevolte gange, het no gmäldet «We are overshooting» (mer staarte dure), und drno isch s Flugzyyg ooben an Hoochwald bim Hoof Heerematt in Wald graast. Gnuu woo, het in däm Nääbel zeerscht emol niemerts gwisst. Am halber elfi isch vom Flughaafe d Vermisstmäldig uusgange. Jetz aber isch e gwaltigi Hilfsaktioon in Gang koo: d Bivelggerig vo Hoochwald, alli Fyyrweere vo dr Umgääbig, au vo Basel, au d Saniteets- und Polizeygreft vo de Kanteen Solodurn, Baselland und -stadt, Samariter und 200 Maa vom Luftschutzbat. 4 sinn im Ysatz gsi. Dr Aabligg vo de vyle Dooten und Verletzten im verschneyte Wald muess furchtbar gsi syy. D Buure vo Hoochwald hänn mit iire Traktore d Fyyrweer- und Granggewäage, wo im Schnee stägge bliibe sinn, uusezooge. Nit numme Schnee und Nääbel hänn d Hilf erschwäärt, nai, glyy sinn au e Huuffe Wunderfitz erschiinen und hänn d Stroosse, wo zem Unfallort gfiert hänn, verstopft. Ze allem Ungligg aanen isch im Dorf au no

dr Stroom uusgafalle. Die Verletzte het me bis zem Abtransport in d Heerematt brocht, die Dooten in e Durnhalle z Dornach. 36 Passagier und e Stewardess hänn iberläbt.

Am 12. Abrille het in dr kathoolische Kirche vo Dornach en Abdanggigsfyyr stattgfunde, wo au dr Bundesroot Hans Peter Tschudi, dr Bischoff Anton Hänggi und dr britisch Bootschafter draa dailgnoo hänn. Und fir d Uusbildig und Erzieig vo de Waisekinder, wo s doo gää het, hänn d Basler Polizey und d Muba Fr. 430'000.- gsammlet. Worum vergiss ych dä Daag nie? S isch Offizielle Daag vo dr Muschtermäss gsi. Graad wo die Offiziellen uff em Rundgang gsi sinn, drifft die Schreggensmäldig yy. My Chef und Frind «Mundi» Wyss, Regierigsroot und Muba-Presidänt, het gwisst, ass är am Midaags-Bankett die Reed, won er vorberaitet gha het, nit ka halte. Well är sich jo wyterhi het miessen um dr Ablauf vom Fescht und um d Gescht aanää, het er mi ersuecht, iim - schnäll - en andere Täggscht z formuliere.

Und dääwääg bin ych e baar Minute speeter im ene Byroo vo dr Muba gsässe, han e neyi Reed fir s Midaags-Bankett gschriibe, e druurigi Reed nadyrlich, und ha mer kenne Gedange machen iber s nooch Nääbenenander vo Freud und Laid im Lääbe.

Carl Miville-Seiler

Bildlegende

Flugzeugabsturz bei Hochwald 1973

